

全唐诗卷三百三十五

卷 335_1

【享惠昭太子庙乐章（亚献终献）】裴度

重轮始发祥，齿胄方兴学。
冥然升紫府，铿尔荐清乐。
奠饗致馨香，在庭纷羽籥。
礼成神既醉，仿佛缑山鹤。

卷 335_2

【夏日对雨】裴度

登楼逃盛夏，万象正埃尘。
对面雷唳树，当街雨趁人。
檐疏蛛网重，地湿燕泥新。
吟罢清风起，荷香满四邻。

卷 335_3

【白二十二侍郎有双鹤留在洛下予西园多野水长松…请之】裴度

闻君有双鹤，羁旅洛城东。
未放归仙去，何如乞老翁。
且将临野水，莫闭在樊笼。
好是长鸣处，西园白露中。

卷 335_4

【窦七中丞见示初至夏口献元戎诗，辄戏和之】裴度

出佐青油幕，来吟白雪篇。
须为九皋鹤，莫上五湖船。
故态君应在，新诗我亦便。
元侯看再入，好被暂流连。

卷 335_5

【酬张秘书因寄马赠诗】裴度

满城驰逐皆求马，古寺闲行独与君。
代步本惭非逸足，缘情何幸枉高文。
若逢佳丽从将换，莫共骅骝角出群。
飞控著鞭能顾我，当时王粲亦从军。

卷 335_6

【真慧寺（五祖道场）】裴度

遍寻真迹蹑莓苔，世事全抛不忍回。
上界不知何处去，西天移向此间来。
岩前芍药师亲种，岭上青松佛手栽。
更有一般人不见，白莲花向半天开。

卷 335_7

【中书即事】裴度

有意效承平，无功答圣明。
灰心缘忍事，霜鬓为论兵。
道直身还在，恩深命转轻。
盐梅非拟议，葵藿是平生。
白日长悬照，苍蝇漫发声。
高阳旧田里，终使谢归耕。

卷 335_8

【中和节诏赐公卿尺（贞元八年宏词）】裴度

阳和行庆赐，尺度及群公。
荷宠承佳节，倾心立大中。
短长思合制，远近贵攸同。
共仰财成德，将酬分寸功。
作程施有政，垂范播无穷。
愿续南山寿，千春奉圣躬。

卷 335_9

【至日登乐游园】裴度

阴律随寒改，阳和应节生。
祥云观魏阙，瑞气映秦城。
验炭论时政，书云受岁盈。
晷移长日至，雾敛远霄清。
景暖仙梅动，风柔御柳倾。
那堪封得意，空对物华情。



卷 335_10

【奉酬中书相公至日圆丘摄事合于中书后阁宿斋…之作】裴度

翼亮登三命，谟猷本一心。
致斋移秘府，祇事见冲襟。
皓月当延阁，祥风自禁林。
相庭方积玉，王度已如金。
运偶唐虞盛，情同丙魏深。
幽兰与白雪，何处寄庸音。

卷 335_11

【太原题厅壁】裴度

危事经非一，浮荣得是空。
白头官舍里，今日又春风。

卷 335_12

【溪居】裴度

门径俯清溪，茅檐古木齐。
红尘飘不到，时有水禽啼。

卷 335_13

【喜遇刘二十八】裴度

病来佳兴少，老去旧游希。
笑语纵横作，杯觞络绎飞。

卷 335_14

【送刘】裴度

不归丹掖去，铜竹漫云云。
惟喜因过我，须知未贺君。

卷 335_15

【再送】裴度

顷来多谑浪，此夕任喧纷。
故态犹应在，行期未要闻。

卷 335_16

【凉风亭睡觉】裴度

饱食缓行新睡觉，一瓿新茗侍儿煎。
脱巾斜倚绳床坐，风送水声来耳边。

卷 335_17

【雪中讶诸公不相访】裴度

忆昨雨多泥又深，犹能携妓远过寻。
满空乱雪花相似，何事居然无赏心。

卷 335_18

【傍水闲行】裴度

闲余何处觉身轻，暂脱朝衣傍水行。
鸥鸟亦知人意静，故来相近不相惊。

卷 335_19

【句】裴度

两人同日事征西，今日君先奉紫泥。
待平贼垒报天子，莫指仙山示武夫。
野人不识中书令，唤作陶家与谢家。
（《题南庄》）
君若有心求逸足，我还留意在名姝。
（答白居易求马）

